



Sud Bosne i Hercegovine
Суд Босне и Херцеговине

Broj; S1 3 Iž 038000 20 Iž
Sarajevo; 23.10.2020.godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi Tatjane Samardžić sa boravkom u Hrvatskoj 22000 Šibenik ul. Pulska br.26, (kod Branka Jelića), koja osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasnje izvan BiH za Lokalne izbore 2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o Ź e n j e

Centralna izborna komisija Bosne i Hercegovine je Odlukom broj i datum navedeni u uvodu odbila upis u izvod iz Centralnog biračkog spiska za glasnja izvan BiH za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani članom 3.15. stav 1, 2 i 3 Izbornog zakona BiH.

Navedenom odlukom odbijena je prijava Tatjane Samardžić koja je blagovremeno izjavila žalbu u kojoj je navela da je podnijela urednu prijavu za glasanje putem pošte na adresi na kojoj živi sa 5 članova porodice. Smatra da ispunjava uslove da se njena prijava prihvati.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci jer je izjavljena od neovlaštenog lica ili da se odbije kao neosnovana jer je osporavana odluka opravdano donesena kako bi spriječilo negativne posljedice koje bi eventualno nastupile dostavljanem glasačkog materijala za više lica na istu adresu. Odredbe člana 5.21 stav 1 Izbornog zakona BiH propisale su da Centralna izborna komisija utvrđuje način i proceduru glasanja građana BiH poštom pa je preispitujući žaliteljčinu prijavu utvrdila da je prijava žaliteljice sa adrese na kojoj je prijavljeno 6 ili više lica i da se radi o izbornom inženjeringu koji može uticati na izborni rezultat.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da je žalba dozvoljena, ali je neosnovana.

Zbog činjenice da je žalba izjavljena sa iste elektronske adrese koja je navedena u prijavi, te cijeneći sadržaj žalbe, nije dovedeno u sumnju da je žalba izjavljena od lica na koga se prijava odnosi.

Prilikom utvrđivanja činjeničnog stanja Centralna izborna komisija BiH je, prema stanju u spisu, pravilno utvrdila da je označena adresa za prijem glasačkog materijala na prijavi, ista kako za žaliteljicu tako i za druga lica sa istom biračkom opcijom za sve prijave. Iz izvoda iz službene evidencije pregledanih prijava proizilazi da se na istu adresu za dostavu glasačkog materijal u Hrvatskoj, Šibenik ul. Pulska broj 26, (kod Branka Jelića) prijavila žaliteljica i još 5 lica. Kada se ima u vidu da ovih 6 lica imaju različita prezimena, da je za više lica naznačena ista mail adresa za kontakt, uz činjenicu da uz žalbu nisu dostavljeni dokazi da žaliteljica boravi na ovoj adresi, sve ukazuje na mogući organizovani izborni inženjering.

Predmetnom odlukom žaliteljici nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izbornoj jedinici u kojoj ima prebivalište u Bosni i Hercegovini.

S obzirom na navedeno i po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA
Sreto Crnjak**